

陶文毅公全集

陶文毅公全集卷二十一目錄

奏疏

修志

書院

創修安徽省志摺子

高淳縣捐建書院摺子

嘉定縣捐建書院摺子

奏疏 修志 書院

創修安徽省志摺子

奏爲創修省志仰祈

聖鑒事竊查江南通志自雍正七年欽奉

諭旨修輯其時安徽藩司駐劄江寧尙未分移安慶一切  
文獻每多簡畧前因纂輯

大清一統志經國史館催取志書各州縣無所承藉  
造送稽遲迄今數年之久仍未能詳備臣思致治  
固宜於因地設教尤重於觀民古者小史掌邦國  
之志外史掌四方之志而土訓誦訓皆得以地圖

地事地俗入告以施其政誠以一方之掌故卽一方之人心風俗所係經緯布置藉資考鏡固非徒以備冊府之守已也我

國家承平數百載

列聖累治重熙休養生息安徽夙稱文物之區涵濡

德化不特名臣循吏儒林文苑志行多有其人卽巖鄉僻

壤孝子順孫貞女節婦例邀

旌典者亦復比比皆是顧聽其歲久湮沒非所以廣

聖化而昭來許也

臣

與藩臬兩司公餘籌議以爲安徽

自分省以來未有志書卽上下江合修之志於乾

隆元年告成迄今已閱九十載愈久則事愈積而  
接訪愈難若田賦水利學校兵制等項尤關重大  
未可聽其散佚爭以酌定章程督飭道府州縣博  
加採訪妥籌經費於省城設局纂修勒限一年竣  
事務俾吏治民風士習咸歸齊萃用備

國家典章之採除俟書成恭

進外所有設局創修省志緣由謹繕摺具

奏伏乞

皇上聖鑒訓示謹

奏

道光五年五月十三日奉到

硃批另有旨欽此同日奉到道光五年四月二十八日

內閣奉

上諭陶澍奏創修省志一摺江南通志成於乾隆元年  
安徽自分省以來未輯通志於掌故難免闕漏茲據  
該撫奏明在省城設局纂修著卽酌定章程督飭所  
屬博加採訪毋濫毋遺並著予限一年纂輯成書以  
重文獻而資考鏡欽此

高淳縣捐建書院摺子

奏爲高淳縣紳士捐建書院懇請

聖恩分別議敘以示獎勵事據江寧布政使賀長齡詳稱據高淳縣知縣許心源先後詳稟高淳舊有書院建自前明迄今二百餘年久已頽廢該縣到任後查有尊經閣一處坐落縣學之後基址寬大房屋整齊修葺擴充可以作爲書院惟掌教束修諸生膏火及修理房舍置備器具等項所費頗多當經邀集儒學及巡檢典史各員公同籌議倡首捐廉設法勸諭各紳士等俱極歡欣鼓舞踴躍捐輸

就所捐田畝及錢文合計共捐錢二萬三千餘串  
現將應辦事宜次第辦竣高淳地係彈丸富戶本  
少外縣商鋪寄居營趁者又不便向其勸捐今於  
兩月有餘本邑官民捐錢至二萬三千餘串書院  
計日告成固屬紳士樂善捐輸亦由董事經理妥  
協詳請分別獎勵等情由該藩司核明除儒學教  
官巡檢典史各員由外記功三百兩以下各捐戶  
另行造冊在外請獎外請將三百兩以上各捐戶  
及勸捐經理最爲出力各董事

奏請獎敘并聲明該縣知縣許心源首先倡捐制錢



一千串勸諭捐錢至二萬餘串得以速成善舉請  
一併議敘以示鼓勵等情前來臣查書院爲教育  
人才之地全在地方官隨時整頓高淳縣書院久  
已頽廢生童肄業無所於培植人才殊有闕繫茲  
經該縣許心源捐廉首倡各紳士踴躍捐輸兩月  
有餘捐錢二萬三千餘串速成善舉洵屬可嘉查  
定例凡士民人等捐修公所實於地方有裨益者  
由督撫具

題捐銀至千兩以上請

旨建坊不及千兩者交地方官給扁如有應行

旌表而情願議敘者由吏部核議等因今據高淳縣知縣許心源將捐輸各紳士造冊請獎由江寧藩司核明轉詳請

奏前來所有高淳縣捐銀二千兩以上之議敘縣丞職銜邢士昕一千兩以上之捐納布政司理問職銜邢邦達文童唐向榮又三百兩至五百兩以上之捐職布政司經歷谷鳳鳴捐納布政司理問職銜邢春華吳欽捐封職員吳位升貢生俞鋒增生陳郁文附生陳殿勳監生陶仁邢鐸李有羣文童唐壽泰陳功俊王錦礪孔廣趙民人韓懷興及勸

捐出力之董事歲貢生孔廣業監生李培基田馨  
仰懇

聖恩俯准交部分別議敘再高淳縣知縣許心源淳明  
篤實於地方公事極力整飭頗得民心今因書院  
久廢首先倡捐千金勸諭紳士於三月之內捐錢  
至二萬餘串得以刻期修復卽行開課辦理甚爲  
妥速并懇

聖恩交部議敘以示鼓勵除將各紳士履歷清冊咨部  
外謹會同大學士兩江總督臣蔣攸銛江蘇學政  
臣申啟賢合詞恭摺具

奏伏乞

皇上聖鑒

訓示施行謹

奏

道光八年十二月初六日奉到

硃批吏部議奏另有旨欽此同日奉到道光八年十一

月十六日內閣奉

上諭陶澍奏高淳縣紳士捐建書院請分別議敘一摺  
江蘇高淳縣書院久已頽廢經該縣知縣首先倡捐  
并勸諭紳士於三月之內捐輸修復據該撫查明懇

予恩施著照所請高淳縣知縣許心源著加恩交部  
議敘其捐銀二千兩以上之議敘縣丞職銜邢士昕  
一千兩以上之捐納布政司理問職銜邢邦達文童  
唐向榮三百兩至五百兩以上之捐職布政司經歷  
谷鳳鳴捐納布政司理問職銜邢春華吳欽捐封職  
員吳位升貢生俞鋒增生陳郁文附生陳殿勲監生  
陶仁邢鐸李有羣文童唐壽泰陳功俊王錦礪孔廣  
趙民人韓懷興及勸捐出力之董事歲貢生孔廣業  
監生李培基田馨著吏部分別議敘欽此

嘉定縣捐建書院摺子

奏爲紳士捐建書院仰懇

聖恩分別議敘以示獎勵事竊照嘉定縣安亭江上有  
明儒歸有光講學讀書之所在菩提寺東偏縣屬  
紳士議建震川書院因該處與昆山新陽青浦地  
界毗連各縣生童均可就近會文咸樂觀成道光  
六年夏規模粗就臣以挑浚吳淞之便親臨考校  
率屬捐廉置措膏火面諭該前縣淡春臺督率試  
用訓導黃穆之張珣監生張鑑朱勲等妥帖辦理  
於書院之東爲歸有光立祠并擴充院舍自興工

以至歲事計捐錢一萬六千八百餘串嗣因膏火等費不敷又續勸捐錢五千二百八十餘串統共捐錢二萬二千餘串茲據該縣知縣保先烈查明勸捐有成詳請獎勵由藩司核議請

奏前來

臣

查明儒歸有光人品淳正學問文章爲有

明之冠乾隆年間曾蒙

高宗純皇帝褒嘉以其文與黃淳耀并稱茲嘉定及崑山

新陽青浦四邑紳士企慕遺風請於該處建立書

院爲生童會文之所寓居客紳亦願助捐自道光

六年經前知縣淡春臺捐廉勸修復經

臣

親臨諄

飭現已踴躍落成擴充院舍并置買田產爲膏火  
及修理之費業經咨部立案并聲明勸捐紳士董  
事人等應行獎勵之處俟飭查另辦在案查書院  
爲培植人文之地該處自創建興工以至籌備膏  
火等項通共捐錢至二萬二千餘串之多善舉速  
成洵堪嘉尙定例凡士民人等捐修公所實於地  
方有裨益者由督撫具

題捐銀至千兩以上請

旨建坊不及千兩者交地方官給扁如有應行

旌表而情願議敘者由吏部核議等因所有興建震川



書院捐銀四千兩以上之嘉定縣監生張鑑二千兩以上之崑山縣捐職州同胡墉五百兩以上之崑山縣候選翰林院待詔胡鏡寓居該處之工部郎中江西臨川人李秉綬仰懇

聖恩俯准交部分別議敘再監生張鑑出貲既多又係董辦出力應請交部從優議獎以示鼓勵又前任嘉定縣知縣捐陞道員淡春臺首先倡捐銀四千餘兩督令紳士創修及現任嘉定縣知縣保先烈妥籌竣事并請

聖恩交部議敘除飭取履歷清冊咨部外其餘五百兩

以下捐貲各人應照例分別咨部請敘及由外記  
獎合併聲明謹會同江蘇學政臣申啟賢合詞恭  
摺具

奏伏乞

皇上聖鑒訓示施行謹

奏

道光十年十月十一日奉到

硃批另有旨欽此同日奉到道光十年十月初一日內  
閣奉

上諭陶澍奏紳士捐建書院懇請獎勵一摺江蘇嘉定

陶文毅公全集

卷二十一

奏疏

九

縣安亭江上有明儒歸有光讀書之所經該縣并毗連之崑山新陽青浦四邑紳士暨寓居客紳捐建震川書院善舉速成洵堪嘉尙所有捐銀四千兩以上之嘉定縣監生張鑑三千兩以上之崑山縣捐職州同胡塘五百兩以上之崑山縣候選翰林院待詔胡鏡寓居該處之工部郎中李秉綬均著加恩交部分別議敘監生張鑑出貲旣多且董辦出力著交部從優議敘前任嘉定縣知縣捐陞道員淡春臺首先倡捐銀四千餘兩督令紳士創修又現任嘉定縣知縣保先烈妥籌竣事俱著加恩交部議敘其餘五百兩

以下捐貲各人照例咨部請敘以示獎勵該部知道  
欽此

陶文毅公全集卷二十二目錄

奏疏 營制

穎亳宿三營添設官兵移駐文武摺子

擬裁各標營兵數目摺子

洪澤湖移設都司摺子

新設洪湖營地方遼闊酌請添設弁兵以重巡防

摺子

安徽潁州艾亭集地方酌改守備移撥兵丁以資

巡緝摺子

河右營王家集等處添移弁兵駐巡摺子

奏疏

督制

潁亳宿三營添設官兵移駐文武摺子

奏爲潁亳及宿州地方緊要必須酌添官兵移駐文武員弁以重巡防仰祈

聖鑒事竊照安省潁州府地處省北邊境附府之阜陽縣幅輳遼濶袤延五六百里原設兵力單薄經調任撫臣孫爾準

奏請移改參遊添設弁兵一案奉

上諭據孫爾準奏潁州府與豫省接壤爲紅鬃捻匪出沒之區防緝宜周兵力尙單現與督臣咨商移改參

遊添設弁兵員缺名數並調撥各營分名糧未及會  
奏移交新任巡撫查辦等語著陶澍會同孫玉庭籌  
度現在情形是否必須添設再行詳查妥議明白具  
奏不可徒事更張有名無實也將此諭令知之欽此

臣陶澍遵卽

奏明俟查春賑之便順道赴彼熟察情形再與

臣孫

玉庭妥議具

奏在案今

臣

陶澍由壽鳳宿州前赴潁州親歷各要

隘相度形勢該府所屬阜陽亳州必須酌添弁兵  
並移駐文員以資彈壓其鳳陽府所屬之宿州幅

順廣袤亦有應增汛防之處至參將與遊擊職分  
不甚相懸且參將所駐之六安州與楚省接壤亦  
關緊要似不必更張移易咨商臣孫玉庭會核情  
形通盤籌計緣潁郡在省城西北邊境距省幾及  
千里阜陽乃附府首邑與河南之項城沈邱新蔡  
息縣固始等縣接壤時有豫省紅鬍匪徒竄入滋  
擾其北界則亳州太和東界則宿州蒙城等州縣  
距城一二百里不等緝捕巡防護解餉鞘人犯在  
在均需兵力查潁州營額設遊擊一員守備千總  
各一員把總四員外委二員額外五員馬步兵丁



五百六十五名內除分防蒙賊守備把總外委額  
外各一員兵丁一百六十九名外郡城駐劄遊擊  
一員千總一員額外二員存城兵二百四十三名  
其餘一百五十三名分駐阜陽之老鸛巷驛口橋  
王市集六十里鋪方家集銅陽城劉家集董家集  
七里鋪等九汛多則三四十名少則十餘名察看  
形勢實覺單薄應請添設存城兵丁五十名以資  
操防差委至於老鸛巷等九汛所設弁兵原屬多  
寡適宜然兩省接壤之區扼要尤在邊界如西北  
鄉之沈邱集距城一百二十里又西銅陽城距城

二百一十里西南鄉之艾亭集距城一百七十里  
稍南方家集距城一百二十里均屬鞭長莫及查  
沈邱集本設有巡檢一員方家集設有縣丞一員  
惟自鮟陽經艾亭以達方家集一帶袤延二百餘  
里與豫省之沈邱項城新蔡息縣固始等處犬牙  
交錯離城既遠地偏俗悍匪徒出沒其間尤難防  
範從前並未議設弁兵本欠周密且艾亭集地方  
衝要爲西南邊界適中之地必須大員駐劄方資  
控馭查該府本有捕盜同知一員駐劄驛口橋距  
城一百里尙易照料應將該同知移駐艾亭集地

方作爲撫民總捕同知凡逃盜逃兇私販私宰賭博打降以及附近民人錢債田土細故所犯在柳杖以下者責成該同知就近分別緝拏審理其罪犯徒流以上一切命盜姦拐等案仍歸有司經理毋庸攙越該處應添設把總一員兵丁四十名以重巡防再銅陽城本無額駐弁兵係於方家集防兵內分駐五名而方家集只存兵五名均不足以資巡防應每處添兵二十五名共成三十名各添外委一員管帶又亳州接壤豫省其西北鄉之減種店僅設防兵九名東南鄉之張村鋪僅設防兵

四名地方曠野離城遙遠不足以資彈壓應請各  
添兵十五名增添外委二員管帶巡防又查宿州  
地方村鎮通境二百一集周圍六百餘里宿州州  
同駐劄濉溪集分管西北四十四集捕務內有東  
北鄉二集州判駐劄臨渙集分管西南三十七集  
捕務並各設有外委一員於分管各集巡緝彈壓  
尙能周顧惟正西通達豫省及正東東南東北等  
處一百二十集捕務俱屬吏目分管近城鎮集尙  
知畏法餘則獷悍成風吏目有管獄之責不能常  
川赴鄉查緝所管集分較州同州判多至倍蓰而

分汛武職又僅止正西之百善驛設有把總一員  
東南之湖溝集正東之大店集各設有外委一員  
其東北數十集並無營弁專駐吏目既有鞭長不  
及之虞而營弁聲勢亦未聯絡曾據署宿州知州  
劉用錫稟請於東北之時村集添設巡檢弁兵以  
資彈壓經臣陶澍周歷宿州查看洵係實在情形  
各屬巡檢旣無可裁之員又難額外增設惟查前  
設南平撫民同知案內曾將鳳陽府司獄一缺改  
作南平照磨嗣因南平又改爲捕盜同知無須照  
磨而府司獄裁改之後亦未復設此缺尙在空懸

司獄與巡檢品級廉俸均屬相等應請將前裁之  
司獄改作巡檢駐劄東北之時村集地方分管六  
十集並添設外委一員卽於該營存城兵丁內抽  
撥兵十名派給外委駐劄時村集以資巡緝再於  
北鄉之夾溝驛添設外委一員並添兵十名駐劄  
巡防統計潁州營添設把總一員外委二員兵丁  
一百四十名亳州營添設外委二員兵丁三十名  
宿州營添設外委二員兵丁十名並於該營移撥  
兵十名如此星羅碁布聲勢聯絡兵威旣壯緝匪  
安民均資得力案查嘉慶十八年海州揚州二營

添兵案內經前督臣百齡奏請於江安各營內分別裁撥其增添員弁等官俸薪銀兩仰蒙

諭旨准其作正開銷等因欽遵在案今潁郡並亳宿兩州三營酌請增設官兵其一切俸餉若概請加增則經費有常難以額外開銷茲亦倣照前辦成案所有添兵八十名卽在於江安各標營內分別抽裁移撥毋須另外增創軍裝器械隨糧移解至請增把總一員每年應支俸薪養廉馬乾等銀共計一百五十一兩二錢又請添外委六員係在馬兵數內仍食馬餉惟每員歲需養廉銀十八兩爲數無

多均應請照海揚二營添設官弁應支俸薪之案  
作正開銷兵房衙署由司籌議捐建以歸節省如  
蒙

俞允所有一切未盡事宜另飭藩司會議詳請分別題  
咨辦理臣等因要地須重巡防起見悉心籌議往  
返咨商意見相同謹合詞恭摺具

奏伏乞

皇上聖鑒訓示謹

奏

道光三年七月初四日奉到



硃批軍機大臣會同該部議奏欽此

擬裁各標營兵數目摺子

奏爲遵

旨查明各標營兵額擬裁數目節省經費仰祈

聖鑒事竊臣承准軍機大臣字寄欽奉

上諭前據長齡等奏籌辦回疆善後事宜請將各省綠營兵額各按馬步守兵分別均勻於百名內暫裁二名將裁缺所截經費解交甘肅藩庫自道光十二年爲始歸入回疆經費項下搭運前往以資支發當交該部查明具奏茲據奏各直省地方險易異宜兵數多寡不一且額兵有在城分汛之別在城者以備差

操爲數稍多分汛者以專戍守人數較少自應由各  
省查明核辦著各該省督撫各按全省兵數以每百  
名暫裁二名核計共裁馬步守兵若干名於所屬標  
營內詳察繁簡多寡情形遇有拔補開革事故所出  
之缺應陸續分別扣除及所裁餉銀糧折馬乾並紅  
白卹賞銀兩應酌定裁減數目一併迅速查明各行  
據實覆奏將此各諭令知之欽此遵

旨寄信到臣當卽移會漕河撫提諸臣並通飭各藩司  
移行鎮協標營一體欽遵詳查去後茲先後接准  
咨覆並據各藩司查議前來臣查江蘇省各標營

額兵三萬八千八百八十三名按百名裁二名計  
應裁兵七百七十七名內有各營額兵尾數畸零  
不及應裁之數計短裁兵四名實計裁扣馬步戰  
守兵丁七百七十三名核計所裁兵數連閭節省  
餉乾米折共銀一萬二千七百三十五兩一錢三  
分七釐五毫本色米二千二百九十五石一斗五  
升又紅白賞卹減裁銀四百二十八兩安徽省各  
標營額兵九千六百九十五名共裁馬步戰守兵  
一百九十三名每年計節省餉乾米折共銀三千  
一百四十五兩八錢三分本色米五百二十石二

斗江西省額兵一萬二千八百一十八名應裁兵  
二百五十六名每年節省餉乾銀三千九百九十  
三兩六錢米九百二十一石六斗紅白賞卹銀減  
裁四百八十兩查江蘇安徽江西三省所裁兵米  
共三千七百三十六石九斗五升請照道光元年  
裁兵之案經前督臣孫玉庭

奏明每石照例價合銀一兩計銀三千七百三十六  
兩九錢五分統計裁兵一千二百一十二名內馬  
兵一百五十五名步兵二百三十九名守兵八百七十  
八名節省餉乾糧折賞卹及米石變價共銀二萬

四千五百一十九兩五錢一分七釐五毫至各營  
應裁兵丁節省餉乾等銀均從道光十二年爲始  
其未經裁定以前各兵應支銀米請於各藩司建  
曠並截存款內動支如存曠不敷卽於坐落各州  
縣先行墊給另於新賦米內歸還其支過銀米兩  
款統俟裁竣之日歸入奏銷案內銷算分別專案  
題咨其安徽省應減紅白卹賞銀兩未經酌定臣現  
已飭催該藩司查議酌定另行咨部查照並飭各  
藩司將裁存馬匹軍械等項照例辦理除將送到  
各營裁減馬步守兵名數及節省銀米賞卹數目

清冊送部查核外

臣

謹會同漕

臣

蘇成額河

臣

張

井江蘇撫

臣

林則徐安徽撫

臣

鄧廷楨江西撫

臣

周之琦江蘇提督

臣

王應鳳合詞恭摺具

奏伏乞

皇上聖鑒訓示謹

奏

道光十二年七月十一日奉到

硃批兵部知道欽此

洪澤湖移設都司摺子

奏爲洪澤湖地方緊要酌籌移設都司專營以資巡  
防仰祈

聖鑒事竊照地方設有專營操巡並重其有今昔情形  
不同不得不量爲更改者仍准隨時調劑歷經遵  
辦有案今查洪澤湖地方爲江南安徽兩省交界  
江南係河標中右兩營及漕標淮安城守營汛地  
安徽係泗州營管轄該湖收納汝潁淮泚渦淝雜  
泗唯濬大小數十水周迴五六百里水面寬闊四  
通八達廬鳳潁泗徐淮各處棍徒以及山東之沂



鄧滕嶧曹單等處回匪往來其間爲遁逃藪其形勢與江浙兩省界連之太湖相同而納污藏垢爲更甚太湖設有內河水師專營巡防嚴密以故奸宄未易潛滋洪澤湖爲江安兩省商賈民船往來要道並未設有內河水師專營匪徒出沒湖中往往有乘機糾搶之案且兩省營汛寫遠聲氣未能聯絡此拏彼竄稽察難周現當票鹽盛行湖行尤須安穩疊經臣分派文武員弁四路按拏獲犯嚴辦冀可稍知斂跡但必須如太湖設有專營俾昭控制而嚴巡防庶湖面永期肅清而商販不致裹

足臣查海州營錢家集地方向係梟犯總匯之區

經前督臣百齡

奏請設立都司一員隨帶千總一員把總一員外委

二員額外二員兵丁二百名移駐歸漕標就近調

遣嗣以差遣不敷復經臣添設額外二員在案蓋

因海州爲出鹽之地其時引地滯銷場鹽堆積鹽

無出路梟徒日多劫搶拒捕凶殺之案無時不有

是以設立專營藉資彈壓今淮北引地改爲票鹽

客販挾貲而來買鹽而去毫無阻滯來者雲集場

池所產鹽斤僅供民商收買無須與梟匪私相授

受而梟匪亦因勾引無人無所獲利自行解散以故海州一帶安集綏救已迥非向日情形錢家集地方似可無須都司駐劄弁兵亦可裁減應請卽以錢家集都司改爲洪澤湖都司仍爲在外題補之缺隨帶把總一員外委一員額外二員馬步戰守兵丁一百四十名駐劄洪澤湖之老子山等處作爲內河水師營改隸河標中營兼轄仍酌留千總一員外委一員額外二員馬步戰守兵丁除上年裁減四名外實餘存兵丁五十六名悉數巡防錢家集汛地仍歸海州營參將管轄如此一轉移

間錢家集地方仍有千總等弁兵分駐不致疎漏而於洪澤湖緊要地方有都司等員弁居中駕馭復有河標中右兩營淮安營泗州營四面策應庶奸匪無從躲匿湖面肅清不特民廬安枕而商旅票販亦得坦行攸賴惟陸路改爲內河水師於營制稍有未協第當地方緊要不得不因時制宜合無仰懇

聖恩俯准以錢家集都司改爲洪澤湖內河水師都司隨帶把總外委額外移駐老子山等處實於地方鹽務兩有裨益如蒙

俞允所有現任都司等員弁兵丁皆屬陸路一時無可

改補應卽於臣所屬內河水師內酌挑弁兵數名

來洪澤湖指引先行雇募民船駕駛緝捕以靖湖

匪而安商旅仍察看移駐各員弁兵丁能否勝任

再行改補調撥一面先募水手兵數十名以資駕

船行駛移駐之官弁兵丁俸餉馬乾等項均照錢

家集原額支領此外攜帶軍械添設巡哨船隻並

移建衙署兵房改鑄印信分管界址一切未盡事

宜由臣督同江安藩臬運司詳查籌議分別

題咨辦理臣爲地方鹽務起見謹會同署南河督臣

張井漕運督臣貴慶合詞恭摺具

奏伏乞

皇上聖鑒訓示謹

奏

道光十三年七月十六日奉到

硃批兵部議奏欽此

新設洪湖營地方遼闊酌請添設弁兵以重巡防摺子

奏爲新設洪湖營地方遼闊酌請添設弁兵以重巡防仰祈

聖鑒事竊照地方營汛必須因地制宜期於巡防得力前因洪澤湖地方緊要經

臣

奏請將海州營錢家集都司弁兵劃分移駐接准部咨錢家集都司一員把總一員外委一員額外外委二員馬步戰守兵一百四十名准其移駐洪澤湖之老子山等處作爲內河水師營分其錢家集

僅留千總一員外委一員額外外委二員馬步戰  
守兵五十六名是否足資彈壓令臣察看情形隨  
時辦理奉

旨依議欽此

臣

查錢家集前設專營原因海州爲產鹽

之地梟徒偷漏橫行藉資彈壓今自改行票鹽以  
來民販叢集梟徒已難託足是以該處日臻救謐  
察看情形尙留千總外委各一員額外二員兵丁  
五十六名儘足彈壓惟查洪湖營都司駐劄老子  
山所轄全湖水面周圍五六百里之遙且成子河  
許家口高家灣應山集曹家嘴堯河束清壩太平



河息浪巷蔣翟壩仁義禮三河沈家嘴馬欄岡鴨  
蛋溝等處界連江安兩省與東豫接界亦近民情  
強悍奸宄易藏此拏彼竄現行淮北票鹽均需渡  
湖赴岸難保不因湖面寬闊見鹽船盛行覬覦搶  
劫查自設營後湖面漸形安靜而分防置汛尤須  
按段派兵始專責成而資周密前請將海州營錢  
家集都司把總外委各一員額外二員兵丁一百  
四十名移駐仍屬不敷分撥擬請添設千總一員  
外委一員額外二員兵丁八十名連前兵共湊二  
百二十名分駐彈壓庶沿湖要隘聲勢可期聯絡

而差委亦不致無人第添設千總一員外委一員  
現查江省各營無可裁抵所有歲需各俸廉應請  
照從前掘港佃湖二營添設千總裁馬改守之案  
辦理卽在洪湖營原移及裁撥馬兵內裁去馬兵  
九名改爲守兵九名每年節省餉乾銀兩抵作千  
總外委俸廉有盈無絀所添額外二員係在馬兵  
數內挑拔仍食本身馬餉毋庸另請動項至添設  
兵丁已准提臣段琨查有事務較簡原設遊擊改  
爲都司之劉河營酌裁兵丁五十名狼山鎮標中  
左右三營其裁兵丁三十名均按馬一戰二守七

之數裁撥應裁馬兵八名戰兵十六名守兵五十  
六名共裁馬戰守兵八十名遇有缺出截扣陸續  
移撥洪湖營募補如此量爲變通既不增添兵額  
亦毋庸另籌經費而於要地巡防益臻嚴密於水  
師營伍地方洵有裨益除飭司將未盡事宜查明  
議詳分別

題咨辦理外謹會同署南河總督

臣

麟慶江蘇提督

臣段琨合詞恭摺具

奏伏乞

皇上聖鑒

敕部核覆施行謹

奏

道光十四年十二月二十三日奉到

硃批兵部議奏欽此

安徽潁州艾亭集地方酌改守備移撥兵丁以資  
巡緝摺子

奏爲潁州營艾亭集地方緊要擬請酌改守備移撥  
兵丁以資巡緝仰祈

聖鑒事竊照地方營汛操巡緊要其有今昔情形不同  
者必須量爲更改以資控制今查潁郡地方民風  
強悍幅幘尤爲遼闊其附郭之阜陽縣縱橫各有  
二百五十餘里之遙該縣屬之西南鄉艾亭集距  
城一百七十餘里與豫省之新蔡汝陽息縣太牙  
相錯爲匪徒出沒之所道光三年潁毫添兵案內

經前督

臣

孫玉庭以艾亭集地方衝要爲潁郡西

南邊界

奏請以潁州府同知移駐作爲撫民捕盜同知添設把總一員兵丁四十名所需廉俸馬乾等銀作正開銷在案續於十一年籌辦回疆經費案內裁兵一名現存三十九名查潁州營額設六汛而阜陽縣居其五內艾亭集把總一員駐艾亭集地方協防外委一員駐方家集地方所轄一十九堡其瓦店集迎仙店雙廟集益鎮集張家寨地里城姜寨集等處均與河南接壤距該汛五六十里至八九

十里不等俱係邊境搶竊繁多且時有捻匪棍徒  
此拏彼竄自移駐同知添設汛防以來因武弁職  
分太微兵力又單尙不足以資控馭由潁州府及  
營縣稟請將把總裁汰改設守備移兵六十一名  
連前存兵丁三十九名共湊一百名庶幾武職較  
大兵丁較多巡防差操可無缺誤而於緊要地方  
大有裨益等情批飭兩司議詳請

奏前來

臣

查艾亭集界接河南五方雜處改設守備

添設汛兵實爲因地制宜起見自應准其改設俾  
資彈壓惟查安省額設守備皆係繁要無可裁移

應請將該處把總一員改爲守備所需廉俸馬乾等銀核計每年應需銀三百四十一兩一錢八釐除裁去原設把總每年應支廉俸馬乾銀一百五十一兩二錢抵補外計不敷銀一百八十九兩九錢八釐合無仰懇

聖恩俯念地方緊要改設守備無可裁抵准照從前該處添設把總應支俸薪之案作正開銷以期緝捕防範均資得力至增益兵丁卽於壽春鎮標所轄中右六安廬州亳州五營內每百名酌撥二名裁撥中營馬兵二名戰兵四名守兵十三名右營馬



兵二名戰兵四名守兵十名六安營馬兵一名戰  
兵三名守兵八名廬州營戰兵一名守兵五名毫  
州營馬兵一名戰兵二名守兵五名以上其酌撥  
兵丁六十一名合艾亭集現設兵丁三十九名共  
一百名潁州營係壽春鎮標所轄營分就本標所  
轄之兵移撥本轄營分既與額數調遣無缺而於  
艾亭集地方藉可得資巡緝亦無須另籌經費其  
潁州營本設專汛守備駐劄蒙城作爲左軍守備  
以阜陽汛蒙城汛王市集汛歸左軍管轄新改守  
備駐劄艾亭集作爲右軍守備以艾亭集汛驛口

橋汛老觀港汛歸右軍管轄以符營制該營額設  
遊擊守備均係陸路外題之缺今艾亭集改設守  
備一員應請一律作爲外題要缺至該處現設把  
總楊化鵬原缺旣裁應暫隸壽春鎮標候補俟有  
本省各營把總缺出卽行補還移撥兵丁軍裝器  
械隨糧移解如蒙

俞允所有移撥兵數一遇缺出卽陸續截扣由艾亭集  
守備另行募補其餘應增兵房改建衙署及頒鑄  
印信一切未盡事宜另飭藩臬兩司會議詳請分  
別

題咨辦理

臣

因地方巡防緊要起見謹會同安徽巡

撫兼提督銜

臣

色卜星額合詞恭摺具

奏伏乞

皇上聖鑒訓示謹

奏

道光十六年三月十一日奉到

硃批該部議奏欽此

河右營王家集等處添移弁兵駐巡摺子

奏爲河標右營汛轄緊要擬請添移弁兵扼要駐巡  
以裨地方仰祈

聖鑒事竊照地方營汛必須因地制宜期於巡防得力  
如有今昔情形不同例應隨時酌改以收實效茲  
據江寧布政使楊策詳稱河標右營管轄邳宿桃  
三州縣地方界在黃運兩河之間幅員一千餘里  
水陸墩堡六十餘處爲重空漕船往來之所私梟  
匪徒最易出沒催趨緝捕事務殷繁額設弁兵不  
敷派撥而桃源縣境之王家里仁穿城等集濱臨

河湖水陸交衝奸宄易藏尤爲扼要王家里仁兩  
集各原設額外一員兵十名按日在穿城集會哨  
實屬汎廣兵單巡防難周該管將備疊次呈請於  
適中之王家集添設千總一員穿城集添設外委  
一員抽撥兵丁五十名分別駐防巡緝並經該管  
道協復加確查委係扼要之區急需添移弁兵以  
資控制擬請援照道光八年河標中營所轄之宋  
家集地方道光十年佃湖營所轄之海安六套地  
方兩處酌添弁兵之案辦理其請添千總一員外  
委一員所需廉俸在於河標廟灣營抽裁馬兵五

名改爲守兵河標中右二營各裁馬兵二名改爲  
守兵計共裁馬改守九名節省餉乾銀兩抵作千  
總外委俸廉有盈無絀至添撥兵丁五十名按戰  
三守七抽撥查有高資營額設頭號商船

奏改海哨船隻案內堪以酌裁戰兵七名守兵十八  
名再酌減溧陽營戰兵一名守兵二名揚州營戰  
兵三名守兵五名泰州營戰兵一名守兵二名泰  
興營守兵二名漕標中左右三營各裁戰兵一名  
守兵二名以上共裁戰兵十五名守兵三十五名  
合符五十名之數添撥河標扼要駐巡洵屬繁簡

各得其宜不致顧此失彼既於兵額無增亦毋庸  
另籌經費而於要地汛防實有裨益等情議詳請  
奏前來臣查核所議係屬因地制宜且與河標中營  
佃湖營添移弁兵成案相符合無仰懇

聖恩俯准添設裁減以重地方如蒙

俞允所有應建衙署兵房估需工料籌款給發毋庸動  
支經費一切裁撥拔募事宜容臣分別咨行辦理

謹會同江南河道總督臣麟慶江蘇巡撫臣陳鑾

江蘇提督臣段琨合詞恭摺具

奏伏乞

皇上聖鑒訓示謹

奏

道光十八年三月十一日奉到

硃批該部議奏欽此



陶文毅公全集卷二十三目錄

奏疏 海防

截留暹羅國通事購買內地幼稚子女摺子

會同蘇撫覆奏押送喫咭喇夷船出境摺子

喫咭喇夷船復來嚴飭堵截情形摺子

會同蘇撫覆奏驅逐夷船開行並嚴飭防範摺子

籌議巡洋會哨章程摺子

籌議嚴禁鴉片章程摺子

奏疏 海防

截留暹羅國通事購買內地幼稚子女摺子

奏爲

奏

聞事竊照暹羅國使前月二十五日由徐州境入安徽

界經 臣 節飭沿途文武員弁妥爲照料一路行走

安靜惟據廬州府朱潢及鳳陽府程懷璟並委員

張連山桐城縣廖大聞等先後稟稱該使臣通事

等入境時攜有幼稚子女詢係前途所買奴婢稟

請查辦等語 臣 思

國家懷柔遠服備極

恩施重譯之人莫非臣僕若內地人民轉聽其遠攜役

使殊於體制攸關應卽截留當派安慶府知府汪

恩同

臣

標守備李鳳輝迎赴前途查辦旋據汪恩

等稟稱初八日迎赴潛山縣境查出隨行子女八

名均非使臣所買閱對契紙其幼孩黃添幅一名

係通事翁日陞用錢一千七百文所買幼女劉丫

頭又名秀姐係通事限役劉六用錢十一千所買

又伴送夷使之雷州府王文苑家人帶有幼孩宋

東吉朱棟兒高連喜朱秋兒四名遊擊文泰家人

帶有幼孩鄭阿連一名署高廉道百順家人帶有  
幼孩徐來喜一名除朱棟兒鄭阿連未立身契其  
餘均係價買尙無別故內劉了頭寄居銅山高連  
喜係掖縣人餘俱滕縣人據供實因覓食其父兄  
將伊出賣質之通事家丁供亦相同當飭護員妥  
速照料前進所有黃添幅等八名現已帶回聽候  
核辦至委員王文苑由舒城回伊原籍太平縣省  
親未入桐城地界等語臣查該幼孩等偶因覓食  
隨其父母轉徙地方官原難一一執途人而問至  
護送委員職有官司豈得毫無聞見一任通事家

附錄卷之三 名二三 二  
人等購買役使萬一夷使效尤成何事體自應截  
留給屬不令攜往至王文苑因何潛回本籍除飭  
太平縣查覆移咨廣東核辦並咨湖北江西一體  
迎查外至截留之子女八名現飭汪守暫送留養  
局擇誠實穩婆妥爲存養一而移查原籍親屬領  
給完聚以免流離再該使臣等已於三月十二日  
出安徽境入湖北境接護合併陳明謹會同督  
孫玉庭恭摺具

奏伏乞

皇上聖鑒謹

奏

道光三年四月十四日奉到

硃批可見諸事留心查辦甚屬得體而此等妄行之委員不可不示以懲誡另有諭旨欽此又於廬州府宋潢等稟稱句旁奉

硃批此等公正地方官甚屬可嘉足見前後撫臣督飭有方屬員不敢蒙蔽朕心甚悅欽此又汪守守字奉硃改恩字

會同蘇撫覆奏押送暎咭喇夷船出境摺子

奏爲查明暎咭喇國夷船業已押送出境並知會前途挨次押令南回以符定例恭摺覆

奏仰祈

聖鑒事承准軍機大臣字寄道光十二年六月初九日奉

上諭富呢揚阿奏暎咭喇國夷船由閩至浙欲赴寧波海關銷貨當飭驅逐開行等語暎咭喇國夷船向不准其赴閩浙貿易今值南風司令竟敢乘便廳入內洋希圖獲利自不可稍任更張致違定例雖經該省

驅逐出境難保其不此逐彼竄著琦善陶澍訥爾經額林則徐嚴飭所屬巡防將弁認真稽查倘該夷船闖入內洋立即驅逐出境斷不可任其就地銷貨並嚴禁內地奸民及不肖將弁等圖利交接務使弊絕風清以肅洋政等因欽此查前項夷船臣陶澍於清江回省途次接據蘇松鎮總兵關天培松太道吳其泰等稟稱該夷有大船一隻約有七八十人小船一隻約二十餘人因被閩浙兩省驅逐於五月二十二日乘風駛入江南羊山洋面停泊經前護

撫臣梁章鉅



奏明在案

臣

思夷性狡詐貪圖貿易顯違定例兼恐

內地奸民乘機勾串別滋事端不可不嚴爲防範  
現當南風司令若竟任其放洋不卽設法截阻一

經驅逐勢必乘風而北由山東逕抵天津又添往

返

臣

陶澍比卽飭委常鎮道王瑞徵馳往吳淞海

口會同該管鎮道密派巡洋舟師三面迎住使之

不得近岸兼斷其駛北之路一面整頓兵威嚴禁

沿海小船毋許接近夷船以防暗地銷售夷貨並

令海營多備巡船押護至浙省交替俾令挨次由

閩折回粵省

臣

林則徐赴任過鎮會晤商及驅逐

所見相同初八日抵任江蘇復加劄飛飭速辦卽據該鎮道等報稱曉諭該夷人等以

天朝禁令祇准在廣東貿易其餘各省皆不准買賣令其作速回帆該夷自閩浙而至江南未能抵岸未免心存希冀比見蘇松鎮船隻排列海上地方兵役嚴查小船不准攏近該夷性本多疑時刻扒上桅杆瞭望見沿海一帶塘岸布列官兵頗露惶懼該船有胡夏米甲利畧通漢語卽向巡船聲稱伊等並非匪人因想求交易而來今蒙曉諭伊等已經悔悟不敢再求買賣現值風狂雨大實在不能

開船只求候風色稍轉卽速開船回去等語迨六月十一日晚間風色稍轉西南卽促令開行該夷船不敢逗遛卽起旋開帆向東南折戩而去蘇松鎮總兵關天培親自督押另飭遊擊林明瑞押赴浙江交界以便交替護送該鎮現報於十二日申刻押護出境入浙江洋面該夷船前在江洋因風暫泊甚屬安靜並未進口滋事內地民人亦無與夷船私相交易之事臣等現已飛咨前途一體派列巡船押護南行俾令由浙至閩回返粵東以免此逐彼竄上副

聖主肅清洋政至意再該夷船乘風寄泊羊山洋面該  
營弁失於防範旋即并力堵截不准進口此時押  
送出境辦理實爲妥速應請免其開參除咨會浙  
江福建接替押送外

臣

等謹會同江南提督

臣王

應鳳恭摺具

奏伏乞

皇上聖鑒謹

奏

道光十二年七月十五日承准

軍機大臣字寄道光十二年七月初七日奉

上諭陶澍等奏嘆咭喇國夷船業已押送出境一摺據稱該夷有大船一隻約有七八十人小船一隻約二十餘人因被閩浙兩省驅逐於五月二十二日乘風駛入江南羊山洋面停泊經該督等飭委巡洋舟師三面迎住使之不得近岸兼斷其北駛之路並令巡船押護至浙省交替俾挨次由閩浙回粵省該夷船有胡夏米甲利畧通漢語求俟風色稍轉卽開船回去迨六月十一日晚間風轉西南卽促令開行旋起旋開帆向東南折戢而去並派蘇松鎮總兵關天培等押赴浙江交界該鎮現報於十二日申刻押護出

境入浙江洋面仍飛咨前途一體派列巡船押護南  
行是該夷船自必由浙至閩至粵乃本月初二日據  
訥爾經額奏登州鎮總兵周志林咨稱六月十八日  
劉公島洋面有夷船一隻乘風駛至詢係前在江蘇  
等省被逐之船等語陶澍等既奏稱將該夷船押護  
南行不任北駛何以復竄入山東境界著陶澍等詳  
查據實具奏將此各諭令知之欽此又於道光十二  
年七月二十一日奉到

硃批另有旨欽此

喚咭喇夷船復來嚴飭堵截情形附片

再<sup>臣</sup>等先後接據蘇松鎮關天培蘇松太道吳其

泰等轉據外洋總巡署遊擊劉桂林稟稱十月二

十八日瞭見佘山直東洋面有夷船一隻行駛前

往查逐等情該鎮卽帶同署吳淞營參將林明瑞

趕往至高家嘴洋面見該夷船豎立三桅船面載

有礮械桅上有旂一面寫天竺國商船字樣隨向

查詢該夷船有能說華語之人據稱天竺國係喚

咭喇屬國船戶名劉羅在船舵水八十名船內裝

載呢羽等物並稱在直東大洋見有江南遭風船

隻經該夷救起水手十二名現要送交等語林明瑞見答話之人認係前次胡夏米船內之夷夥甲利卽問其因何復來又稱前船已經回南現又跟隨劉羅同來求通貿易等語並據該夷將難民徐勝何耿揚姚顯章張天貴施正方倪太和宋振貴姚大安倪和上滕大興徐五福徐效全共十二名用腳船送出訊明均係崇明縣人在周長發船上充當水手一共十三人因船隻遭風沈溺遇該夷搭救十二人尙有劉連一人見寧波船上救去各難民俱有住址現飭確查崇明縣有無周長發商



船出口交保分領查該夷甲利本在胡夏米船上  
作夥之人且船係自北而來似卽係胡夏米由奉  
天折回之船據云前船已回此另係劉羅船隻殊  
不可信其所掛天竺國商船字樣亦未必非藉此  
爲更換面目之計惟該夷因有搭救難民之事仍  
懇求銷貨進口其情詞尙屬恭順臣等仰體

諭以

天朝定例止准在於廣東貿易俾令恪遵

功令迅速回帆第夷情狡詐野性難馴難保其不藉

端逗遛業已分飭沿海文武員弁於明白曉諭之  
中一面整頓聲威妥爲防範不許沿海居民私相  
交接使該夷無所希冀現據該道吳其泰稟連日  
雨雪交加風色欠利一遇順風卽行押送出境臣  
陶澍因遠在清江浦往返需時卽由臣林則徐會  
同提臣等就近督飭妥辦除俟押送交替再行具  
奏外合先附片以

聞伏乞

聖鑒謹

奏

道光十二年十一月二十八日奉

上諭陶澍等奏稱十月二十八日余山直東洋面有夷船一隻豎立三桅船面載有礮械桅上有旗一面寫天竺國商船字樣該船有說華語之人據稱天竺國係暎咭喇屬國船內裝載呢羽等物並稱在直東大洋見有江南遭風船隻經該夷救起水手十一名現要送交等語並稱答話之人係前次胡夏米船內之夷夥甲利據云前船已回此另係劉羅船隻殊不可信該夷狡詐性成難保其不藉此爲更換面目之計且船係自北而來甫由奉天折回又駛至江蘇洋面

誠恐其又闖入他省著奕顯琦善陶澍程祖洛鍾祥  
林則徐富呢揚阿魏元烺等分飭沿海文武員弁於  
夷船到境時立即驅逐不許令其停泊登岸將貨物  
與民人交易至該船所需小米尤不許沿海居民私  
行賣給接濟祇須嚴密防堵斷不准用礮轟擊及上  
船搜查貨物以致滋生事端是爲切要該夷船一抵  
廣東著盧坤朱桂楨中祥等諭以天朝制度只應在  
廣東交易務須遵守定例不准私越各省卽飭該國  
大班管束飭令迅速回國至該夷船用腳船送出難  
民徐勝等十二名訊均係崇明縣人在周長發船上

充當水手尙有劉連一人見寧波船上救去著陶澍  
林則徐確查崇明縣有無周長發商船出口之事據  
實具奏將此各諭令知之欽此又於道光十二年十  
二月十三日奉到

硃批另有旨欽此

會同蘇撫覆奏驅逐夷船開行並嚴飭防範摺子  
奏爲夷船驅逐開行現飭舟師押赴浙洋並分別飭  
查防範緣由恭摺奏祈

聖鑒事竊

臣

等前因英咭喇國夷船復至江省洋面當

將督飭曉諭緣由附片具

奏在案

臣

林則徐先於接准提鎮咨會時卽委候補

知府善慶太湖協副將鮑起豹馳赴海口隨同鎮  
道並會同上海寶山兩縣酌賞該夷人猪羊酒食  
以獎其救護難民仍剴切曉諭不准違例銷貨並  
將難民徐勝等十二名收回訊取確供交保分領

回籍正在催令開行間欽奉

上諭據國祥等奏十月初二日在隍城島遙見西南海面有暎咭喇國夷船一隻行駛甚速著嚴飭沿海州縣及水師營弁管帶兵丁駕駛船隻於該夷船過境立即驅逐不許令其停泊登岸將貨物與民人交易致令滋生事端至米糧尤不許沿海居民私行賣給接濟等因欽此

臣

等恭錄欽遵復飭文武各員妥速

驅逐並嚴禁沿海居民不許以米糧私賣接濟旋據稟覆海口行商鋪戶因奉嚴諭公立議單同詣天后廟前焚香設誓悉皆凜遵法度概不與夷人交

易該夷人見貨物不能銷售且官兵稽察森嚴卽糧食亦無從私買心生畏憚旋向營船聲稱前在洋中搭救商船致將梢篷折損求賞木板鐵釘趕緊修艙一俟雨雪稍止卽當開行等語當經蘇松鎮關天培蘇松太道吳其泰酌賞木板鐵釘催令趕修茲據稟報該夷船於十一月十五日起旋掛帆乘風開行臣等責成該鎮關天培督率將弁兵船押逐南行凜遵前奉

諭旨務令與浙省舟師明白交替不敢稍任含混並飛

咨浙江撫臣提臣一體押逐回粵第夷情狡獪或



於押赴東南深水外洋之後料知師船不能寄旋  
仍復繞越過北亦須預防一面咨會山東撫臣分  
飭沿海縣營嚴行堵截以防竄越至此次夷船內  
能懂華語之夷人甲利一名卽係前次胡夏米船  
內夷夥臣等以胡夏米前船竄往高麗之後尙未  
得實在下落今旣認有前次夷夥且係自北而來  
則該船自卽係胡夏米之船當經移行提鎮並飭  
府縣確切查覆旋據僉稱此次夷船比胡夏米之  
船小至二丈有餘檣桅亦少一道細加察認並非  
原船因卽詰詢甲利從何又來其胡夏米原船究

往何處據甲利聲稱此次劉羅之船於七月十八日自天竺國開行原欲運赴廣東因南風甚大吹到越南口岸適胡夏米之船到彼相遇胡夏米乘坐原船回去伊即般過劉羅船上從直東深水大洋乘風向北十月初間到關東蓋州洋面天寒冰凍不能停留隨又乘風南行復至江南等語查該夷人一面之詞原難憑信即使所言屬實其爲包攬指引已屬顯然此次因有救護難民希圖藉通貿易今貨物仍不准銷諒可杜其妄念據稱十月初間在關東蓋州洋面似即係隍城島所見之船

被逐折回但既非胡夏米原船則胡夏米究竟會  
否回國尙未可知臣等現飭水師將弁押送至浙  
省明白交替之後仍須在洋時加瞭探倘復有夷  
船竄至立即堵截回南並飭沿海營縣隨時防範  
不得以此次夷船業已開行卽爲了事一面咨會  
廣東省查明胡夏米前船並此次劉羅之船果否  
回粵統飭該國大班管束外所有夷船業已押逐  
開行並飭查防範緣由謹合詞恭摺具

奏伏乞

皇上聖鑒謹

奏

道光十二年十二月初五日奉到

上諭陶澍等奏夷船驅逐開行現飭舟師押赴浙洋並  
分別飭查防範一摺此次嘆咭喇夷船向營船聲稱  
前在洋中搭救商船致將梢篷折損求賞木板鐵釘  
已於十一月十五日起旋掛帆開行仍著該督等責  
成該鎮督率將弁兵船押逐南行務令與浙省舟師  
明白交替毋許含混並著飛咨浙江省一體押逐回  
粵第夷情狡獪或於押赴東南深水上洋後仍復繞  
越過北並著飛咨山東分飭沿海縣營嚴行堵截以

防竄入再此次夷船比胡夏米船小至二丈有餘槳  
桅亦少一道據甲利稱胡夏米乘坐原船回去伊卽  
般劉羅船上其爲包攬指引已屬顯然惟旣非胡夏  
米原船則胡夏米曾否回國尙未可定該督等仍飭  
水師將弁押送浙省明白交替後在洋瞭探倘復有  
夷船竄至立即堵截回南並著沿海縣營隨時防範  
仍遵前旨不許令其停泊登岸將貨物與民人交易  
至米糧尤不許沿海居民私行賣給並著咨會廣東  
查明胡夏米及劉羅船果否回粵統飭該國大班管  
束將此諭令知之欽此又於道光十二年十二月二

十日奉到

硃批另有旨欽此

籌議巡洋會哨章程摺子

奏爲遵

旨嚴飭巡洋員弁實力巡哨定議勸懲章程以肅洋政

恭摺奏祈

聖鑒事竊

臣

接准兵部咨欽奉

上諭御史周彥奏慎重海防一摺嗣後務當嚴飭所屬  
各按定期巡洋會哨並責成該管巡道臨時查察取  
結至各營弁兵尤應勤加練習技藝嫻熟悉成勁旅  
不致視洋面爲畏途出洋戰船是否應需修造沿海  
礮臺額數查明築自何年安設何汛舊貯礮位幾尊

防守兵丁是否足額詳細造冊報部備查倘仍畏葸  
偷安操防疎懈定將該督撫提鎮等從嚴懲處等因  
欽此欽遵咨行查照臣查外海水師責在巡洋如果  
統巡總巡分巡各員認真會哨履險如夷盜船焉  
能游奕夷船亦何能乘風駛入內境洋面誠恐各  
該巡員實不免有畏葸偷安情事當經照飭蘇狼  
兩鎮嚴督水師弁兵勤加練習使其熟諳水性並  
按期親赴洋面當面取結會哨確查戰船礮臺安  
設礮位及防守兵丁是否足額開造清冊呈送並  
飭藩臬兩司會同巡道悉心核議勸懲章程詳覆



核辦去後茲據該司道等會議詳覆前來臣查江  
南洋面南方以大羊山馬蹟山爲界與浙省毗連  
再南爲閩粵洋境又與暎咭喇各國海船相通東  
方以與浙省相接之盡山爲界此外爲深水大洋  
可通

盛京山東與朝鮮諸國其西爲吳淞口岸北爲大安  
戲臺等沙再北卽爲內地海洋之中有佘山又東  
北由鹽城縣起橫亘千里直抵北洋其沙尖與鶯  
遊山相對沙尖以南屬江南沙尖以北屬山東卽  
以鶯遊山爲界此洋境四至之大概情形也江南

省水師設有蘇松狼山兩鎮蘇標管轄中左右奇  
四營均屬外海營分狼標管轄中左右掘港泰州  
泰興三江七營又兼轄漕河標鹽城廟灣東海三  
營內除中左二營係內河泰州泰興三江三營係  
陸路其餘均爲外海營分其官各設一總兵其屬  
自副參以下其分轄洋面由馬蹟山北至佘山爲  
外洋崇明北面之戲臺沙爲內洋係蘇鎮所轄佘  
山以北至大安戲臺等沙爲外洋又由大安戲臺  
等沙以北爲內洋係狼鎮所轄陸路則有吳淞崇  
明等處礮臺兵房水師則有大船小哨闊頭舢板

等戰船以資駐防駕駛此該兩鎮管轄之營分洋面礮臺墩防戰船之大概情形也該兩鎮赴洋巡哨均遵照定例以三月爲一班每班分春夏秋冬四季以兩鎮總兵爲統巡副參遊擊等官爲總巡都守以下爲分巡委巡各按界址督率員弁兵丁駕馭戰船攜帶器械於內外洋面輪流巡查蘇松鎮於每年五月十五日親往大羊山洋面與浙江定海鎮會哨一次松太道豫赴會哨處所俟兩鎮到齊取結詳報又蘇鎮委員每月於佘山洋面與狼鎮員弁會哨一次狼鎮委員每月於大安戲臺

等沙洋面與蘇鎮營員會哨四次又於柰山洋面與蘇鎮委員會哨一次蘇鎮與狼鎮因分界之柰山及戲臺沙等洋面僅隔百餘里既有各員弁按月會哨且該鎮等駐劄衙門均離海較近故兩鎮向未親自會哨又狼鎮兼轄自鹽城縣起之洋面亦以狼鎮爲統巡遴派鹽城等三營員弁按季在洋輪巡鹽城營與掘港營會哨廟灣營與鹽城營會哨又與東海營會哨東海營與山東登州營會哨此該兩鎮赴洋巡哨之大概情形也伏思本省防海定例已極詳明辦理向無錯誤乃上年尙有

喚咭喇夷船潛入江省洋面驅行後復由山東折入之事雖江境洋面遼闊海路又四通八達防禦較難而該夷人意圖交易去後復來若不申明舊例酌定章程何以鼓勵弁兵綏靖海洋現奉

聖訓指示周詳欽遵劄飭司道會議除戰船均係按例修造並無虧朽礮臺營房因上年雨水較多間有坍塌現由藩司分飭管轄州縣會營趕緊勘估興修此後遇有損壞亦卽隨時修理務使一律完好以資防汛弁兵棲宿再戰船數目暨礮臺年分地北礮位兵丁數目現據蘇狼二鎮造具清冊咨部

備核其統巡總巡分巡分班出洋巡哨浙江定海鎮於五月十五日與江南崇明鎮卽蘇松鎮會哨於大羊山責成該管之松太巡道豫赴會哨處所當面取結向係遵照定例辦理毋庸再議惟會哨定期時倘風大難行例准該提鎮選定日期豫行關會但關會無一定期限而到洋恐不免參差應請嗣後定海鎮與蘇松鎮五月十五日例請會哨之期將是否風大難行有無改期情由約計除去行文程限及赴洋日期於五日前先行移知松太道前往取結按例辦理一面將公出緣由申報查

核如此酌定章程庶巡防益昭詳密而巡道亦無  
羈候之虞至出巡弁兵全在熟悉水性不畏風濤  
尤應教其熟識沙線方能經歷重洋若不明定章  
程不足以資勸懲應請嗣後隨帶會哨營弁千把  
等官除於會哨期內如有拏獲盜匪奸船例應議  
敘及遇有失事託故不行例應降罰均遵照定例  
辦理外仍令該管遊擊守備於統領出巡時留心  
察看如果熟諳水性不畏風濤准於每哨一次記  
功二次於每季換班時詳報上司存核得有記功  
八次如係千總卽照外海水師千總俸滿例由督

臣提臣嚴加考核發交統巡大員帶領出海試驗

屬實准其保送如係把總酌照千總俸滿例由副參巡道嚴加考核詳明總督提鎮飭交隔營副將等將帶領出海試驗屬實准其拔補千總如有不諳水性畏懼風濤每次予以記過二次亦於換班時詳報積至記過八次亦由該管上司詳明總督提鎮飭令交給本營副參等將考驗如技藝亦無可觀者卽行斥革如弓馬尙屬可觀准其改撥陸路其守備以上各官均由該管統巡隨時察看詳記檔冊於保薦案內聲明聽候核辦至於所帶兵



丁令該管官於統領出巡時留心察看如有熟諳水性不畏風濤者每一次亦准其記功二次於換班時報明存案積有記功八次遇有外委缺出秉公考驗無論技藝多寡儘先拔補如係不諳水性畏懼風濤每一次亦記過二次於換班時具報積至記過八次如技藝亦無可觀者卽行革伍若技藝尙可造就亦准改撥陸路其舵工如給有舟師外委委牌者卽照把總例辦理如未給有委牌者卽照兵丁例辦理如此立定章程庶弁兵均知奮勉而水營益昭嚴肅總之陸師以操演弓馬爲先

水師以巡歷洋面爲重江省蘇狼兩鎮水師旣由  
統巡總兵督率官弁兵丁按例赴洋會哨所帶弁  
兵又由各上司各該管官詳報功過其蘇松鎮與  
浙省定海鎮會哨之時松太道親往取結戰船礮  
臺營房均係隨時修造整頓極其周密自不敢視  
爲具文虛應故事惟欲令弁兵之巡洋得力尤在  
提鎮大員欽遵

諭旨查照定例轉飭副參都守各員督率弁兵隨時訓  
練使其技藝嫻習不畏波濤且豫識風沙水線一  
旦隨同巡哨自能駕船下海若履平地近可以緝

捕盜賊遠可以威攝外夷糧餉不患虛糜舟師悉  
歸有用倘或統巡總巡分巡及取結各官並不親  
身督率前往礮臺等項並不隨時修理一有覺察  
臣惟有核實嚴參以仰副

聖主整頓海洋之至意除將蘇狼兩鎮送到清冊咨部  
查核外所有籌議緣由謹會同江蘇巡撫臣林則  
徐江蘇提督臣段琨合詞恭摺具

奏伏乞

皇上聖鑒敕部核覆施行謹

奏

道光十四年正月初八日奉到

硃批兵部議奏欽此

籌議嚴禁鴉片章程摺子

奏爲遵

旨籌議嚴禁鴉片章程以塞漏卮恭摺覆

奏仰祈

聖鑒事竊

臣

於本年五月初二日准刑部咨開道光十

八年閏四月初十日奉

上諭黃爵滋奏請嚴塞漏卮以培國本一摺著盛京吉林黑龍江將軍直省各督撫各抒所見妥議章程迅速具奏摺並發欽此當卽遵照部咨轉行江蘇巡撫漕運總督南河總督一體欽遵在案

臣

伏思鴉片

烟之害起自粵洋流毒內地中其引者殒身廢務如醉如迷久且竭中國之貲財貽害及於

國計苟有人心孰不切齒痛恨溯查鴉片本名阿片又名阿芙蓉見於明人所著本草綱目及醫鑑等書初未言其爲害也

國朝康熙二十四年開禁南洋鴉片列入藥草項下每斤徵稅銀三分其後吸食漸衆嘉慶十五年奉有

嚴禁其時已知引毒之爲害而耗財猶未甚也嗣復屢議科條加重辦理然惟開館者議紋販賣充軍吸食

之人杖徒而已不至於死也而吸食成引者頃刻  
無烟卽有性命之憂是以甘心觸犯而購求愈切  
奸販乘其所急得以擡價居奇胥役之包庇關津  
之賣放皆從此起迨至暗市移於荒僻快蠚出於  
深宵衝風破浪冒九死以犯不韙而鴉片愈益於  
貴價值愈益擡高矣價愈擡而紋銀之出洋遂愈  
多矣是非不禁也禁之而不嚴適以毆之轉不若  
不禁之猶可聽其起落而銀出不若是之甚也惟  
鴉片之禁久已垂爲

功令旣未便更張而弛其禁如該鴻臚所陳謂內地

所熬烟土食之不能過引是雖開種罌粟之禁亦未必能易其所嗜而欲力挽頽波俾免紋銀透漏則該鴻臚重治吸食罪以死論之奏實亦出於萬不能已之苦心而爲救時之急務也在

朝廷好生德洽欽卹惟明豈不知吸烟止於自害未遽同於殺人者死而舉世波靡非重典無由震懾卽如酒以成禮而周書言羣飲者執拘盡殺何況吸食鴉片之人酖毒晏安久成廢物予以自新猶不知改誠如該鴻臚所云是不奉法之亂民置之重刑毫不足惜我



皇上仁育義正如蒙

特敕重辦誠有合於生道殺民刑期無刑之義惟是拏辦吸烟不難而難於獄市不擾若辦理無次而騷動及於閭閻窒礙先於行旅必致處處可生陷穽而良懦皆驚不但耗天下之財且傷天下之元氣轉非所以培

國本也至吸食鴉片既加重至死則凡情重於吸食者自應一律加重以絕來源臣等思再四苦無良策謹據所見條議於後伏候

聖裁

一勸戒烟引宜刊方施藥並舉也查該鴻臚寺卿  
原摺請給一年限期戒烟斷引自今年某月日  
起至來年某月日止若一年後仍然吸食卽置  
重典等語查鴉片烟本卽內地罌粟花所作聞  
漢咭喇夷人更取陳死人士和之並有蟲如螞  
蝗者燒灰雜入其中一落腸胃見水卽生化而  
爲引得烟始帖轉更爽健黠者遂神其說謂可  
以提攝精神效在人薺之上其實蟲生於烟飢  
吞飽吐無非本人之元氣引重則未有不死者  
歷來斷除之方如忌酸尤南瓜藤露四物湯十

全大補湯和烟灰服之皆有效驗惟沈溺於烟者雖有方而不肯服其貧無力者又或有方而艱於配藥臣已飭首府刊刻各方轉行徧貼曉諭各處聞風知儆紛紛購藥斷烟並有好善之士選方配藥廣爲布施於窮民無力購藥者尤爲得濟現復通飭各府州縣一體照辦總期於本年內各處均知俾資改悔

一烟具烟土宜分別毀繳也向來查辦鴉片各案總以烟具烟土爲憑二者之中微有分別如售賣烟槍有用金玉鑲配者奇巧精緻其爲有心

犯法無疑亦有用泥土竹木製造雜入貨攤售  
賣者多係小本營生罔知律禁一經查拏此輩  
必先受其擾應飭令自行銷毀改業仍限一月  
爲期逾限卽辦至若烟土一項若亦聽其銷毀  
勢必仍行藏匿久之吸食自便是本未拔而害  
無由弭也勒限兩月內自行稟繳到官燒毀毋  
許稍有存留違者加重懲辦俾懲創之中仍分  
別輕重酌予自新之限以斷後患

一查辦鴉片宜分任各教官選同公正紳耆廣爲  
勸導也查原摺所請禁戒鴉片既定一年爲限

各省地大人衆有司官難以家喻戶曉卽徧貼告示亦恐視爲具文其耽於吸食者或謂一年限期尙早未肯遽斷卽自稱禁絕者亦無憑察考若令到官自首又恐徒益紛繁趙趙弗前是革面已難何論革心耶因思古人月旦之法以鄉評別人之善惡而等差之月有升降足示勸懲現例每逢朔望宣講

聖諭亦無非因勢利導化民成俗之意今鴉片傳染已深各學教官咸有教化之責應由州縣會同各該學選派紳耆中明白公正素行信服者各限各

境查出食烟之人諭令改悔仍於宣講之次傳  
集鄉衆曉以大義廣爲勸導昔陸九淵於白鹿  
洞講義利之辨聞者至爲流涕朱子謂其切中  
晚近人心陷溺之病如果剴切詳明敷宣木鐸  
必能開豁愚頑較之出示曉諭自更有益

一查辦鴉片宜責成保長不必隣佑互結也該鴻  
臚請於一年後取具五家隣佑互結仍有犯者  
准令與發給與優獎倘有容隱一經查出互結  
之人照例治罪等語查五家之中良莠不齊如  
係同吸鴉片之人自必容隱出結甚至勾通串

庇卽永無舉發之期若稍知自愛者不但不肯  
出結而亦難於舉發何者吸烟之人父師之教  
所不能入何況隣佑一經舉發不但深仇遠憾  
將種怨於子孫而且傳審質對已牽連於官府  
彼隣佑者豈不慮此勢必隱忍扶同而又不免  
於出結之誅彼隣佑何辜而受此吸烟之累非  
所以安良善也至保長爲城鄉牌甲之首果有  
吸食之人無不周知且稽察奸宄是其專責無  
可顧忌自不難於舉發倘有容隱或舉發而不  
實不盡亦不難於斥革懲辦所有隣佑出結連

坐之例似可毋庸置議以免波累

一審辦烟案宜確審速辦以免反覆也該鴻臚奏稱吸食鴉片是否有引到官熬審立刻可辨等語查鴉片有引熬審立見自不難於辨別惟

國家慎重人命例須由府轉司招解過院始成信讞方其質訊取供收監轉解有需時日而此囹圄道途之中猝然引發年老氣衰者或致倒斃其壯年氣血旺盛引尙未深者熬至數日或已全愈人情刁詐或以爲陵辱至死或以爲栽誣陷害曉詞翻案勢所不免自應確切取供迅速招



轉俾不至逕延更變藉口圖翻其引發而死者  
供證確鑿應毋庸議其引淺全愈者但能切實  
改悔似可量寬一線仍照柳枝本例滿日取具  
改悔切結責釋完案俾其自新倘再犯到官加  
倍治罪

一查辦烟案必須本官親自督拏如有假冒巡查  
卽應從嚴究治也各州縣查辦案件不能不假  
手吏役而吏役率多無賴不但包庇賄縱甚至  
般弄訛索無所不爲是以吏役詐贓定例綦嚴  
各州縣不能箝束必致轉爲所用狐假虎威動

滋紛擾此非章程所能懸定惟在各州縣身先督率其弊自除否卽嚴參示儆至各處匪棍竟有藉按查鴉片爲名假充吏役突行劫搶陸則夤夜打門水則聚衆登舟翻箱倒篋搜取貲財如該鴻臚所稱借查烟爲名於往來客商肆意留難勒索者又不僅在吏役而假充吏役之害爲尤烈也應請嗣後如有假充吏役官弁借查烟搶物者無論得贓輕重均照強盜入室按贓例問擬斬決以安行旅

一興販鴉片宜加重罪名也定例興販鴉片烟照

收買違禁貨物例枷號一個月發近邊充軍爲從杖徒等語今買食之人議死若與販仍止軍徒似非平允此等棍徒本大力大到處勾通網利肆行播毒罪尤禍首情理難寬應請比照用藥迷人已經得財之例將爲首與販者問擬斬決其餘爲從俱改發回城爲奴以杜傳播

一紋銀出洋應分別加重嚴辦也定例黃金白銀違例出洋白銀數在一百兩以上者發近邊充軍百兩以下杖一百徒三年爲從及知情不首之船戶各減一等失察賄縱之汛口文武各官

俱照失察賄縱米穀例懲辦等語竊以爲海船  
出入豈得毫無日用百兩以下似可不究若百  
兩以上與數萬數十萬百萬同一科斷殊覺未  
安此等鬼蜮出沒風濤蠹國蠹民專心向外律  
以私通外夷罪有浮焉如該鴻臚所奏每歲紋  
銀出洋數至二三千萬之多若果屬實殊堪髮  
指該鴻臚請於吸烟擬死亦因紋銀出洋之故  
豈於盜運出洋之本犯轉行寬典不加分別應  
請嗣後紋銀出洋數及萬兩者一經查獲立即  
請

令正法梟示海口以快人心而絕烟源

以上各條均按照該鴻臚寺卿原奏參以微臣所見分晰籌議至於吸食雖擬死罪仍須分別等差協中定制應由刑部妥議具

奏頒行又原摺請將拏獲鴉片照拏獲強盜例送部引

見係爲鼓勵奮興起見亦應由吏兵二部議

奏辦理如果奉

旨飭行號令一新遠近同心文武合力先清內署之劣幕歪奴各做衙門之奸胥猾吏有犯必懲不驕良

善行見疵厲全消有司不犯不獨鴉片斷絕而民  
氣蒸蒸咸欣

聖化彌羣

國本於無疆矣所有

臣遵

旨籌議各抒愚見緣由理合恭摺覆陳伏乞

皇上聖鑒

訓示施行謹

奏

道光十八年七月十五日奉准

軍機大臣片知此摺存

內備查